

光緒山西通志

名宦錄十四

錄一之十四

山西通志第一百十四

賜進士出身頭品頂戴兵部侍郎兼都察院右副都御史巡撫山西提督軍務臣張爾霖

旨監修

武職

蕭由字子驕東海蘭陵人望之子也舉賢良遷太原都尉治

有聲多稱薦者元始中爲中散大夫終官

案太原都尉治廣武今代州也

弓里成爲騎都尉建武二年將兵平定北州到太原歷訪英俊大人問以策謀成見溫序奇之上疏薦焉序後遷護羌校尉死義於隗囂當時以成爲知人

右漢二人

于栗磾代人登國中拜冠軍將軍永興中關東羣盜大起西河反叛栗磾受命征伐所向皆平卽以本號留鎮平陽轉河

內鎮將築壘河上親自守焉禁防嚴密斥堠不通宋高祖伐姚泓憚粟磾不敢前進遣書請假道西上題曰黑狗公麾下粟磾以狀表聞太宗許之因授黑狗將軍粟磾好持狗以自標宋兵望而異之故有是語進新安公遷蒲坂鎮將時宏農河內上黨三郡賊起粟磾討平之卒贈太尉

蒲州府

安原遼東人雅性矜嚴沈勇多智略明元時爲獵郎出監雲中軍事以驍勇任爲將鎮守雲中寬和愛下甚得眾心以功賜爵武原侯

段進太武初爲白道守將蠕蠕大檀入塞圍之力屈被執進抗聲大罵遂爲所害追贈安北將軍

來大千代人累遷征北大將軍賜爵盧陵公鎮雲中兼統白道軍事寇賊北叛大千前後追擊莫不平殄世祖以其壯勇

敏有戰功兼悉北境險要詔巡撫六鎮以防寇虜經略布置
甚得事宜後吐京反以大干爲都將討平之在吐京卒喪還
停於平城南世祖出還見而問之左右以對世祖悼嘆者良
久詔曰大干忠勇盡節功在可嘉今聽喪入殯城內諡莊
元休景穆子元興二年封安定王孝文時出爲使持節征北
大將軍撫冥鎮大將蠕蠕入塞休身先將士擊走之

宇文福其先南單于之遠屬也世爲擁部大人福少曉果有
膂力性忠清以信馭人甚得聲譽後除懷朔大將至鎮卒

費穆字朗興代人于之孫也襲男爵六鎮反叛詔穆爲別將
隸都督李崇北伐都督崔暹失利崇將班師會諸將議曰朔
州是白道之衝賊之咽喉若此處不全則并肆危矣今欲選
諸將一人留以鎮捍不知誰堪此任僉曰無過穆者崇乃請

爲朔州刺史仍輔國將軍尋改除雲州刺史穆招離聚散頗
得人心時北境州鎮悉皆淪沒惟穆獨據一城四面抗拒孝
昌中二絳蜀反以穆爲都督討平之後進封趙平郡開國公
元顥以河陰酷濫事起於穆詰而殺焉莊帝諡武宣

叱列平代郡西部人襲第一領民酋長孝昌末拔陵反叛茹
茹餘眾入寇馬邑平以統軍屬有戰功後牧子作亂劉胡喻
斛律可那律俱時搆逆以平爲都督討定胡喻等齊神武起
義平歸誠從平爾朱兆武定初除廓州刺史以上歸殺道

右後魏八人

皮景和琅邪下邳人父慶賓正光中使懷朔遇世亂因家廣
甯之石門縣景和少通敏善騎射武定二年征步落稽世宗
疑賊有伏兵令景和將五六騎深入一谷中值賊百餘人便

共裕戰景和射數十人莫不應弦而倒高祖嘗令景和射一野豕一箭而獲之深見歎賞封永甯縣開國子從定稽胡從討茹茹菴羅辰於陜北又從平茹茹餘燼河清三年突厥圍逼晉陽令督領後軍赴并州未到賊已退仍除領左右大將軍又除并省五兵尚書周通好後常令景和對接每與使人同射百發百中武平中又從斛律光率眾西討克姚襄白亭二城別封永甯郡開國公進文城郡王卒

右北齊一人

長孫晟字季晟河南洛陽人性通敏略涉書記善彈工射趨捷過人以功累授左勳衛驃騎將軍開皇十九年遣晟領五萬人於朔州築大利城以處歸誠者晟奏言歸者既眾雖在長城之內猶被雍虞閭侵襲不得甯居請徙五原以河爲國

掘爲橫塹令處其內人必自安上從之明年復還大利城安

撫新降終右驍衛將軍

和林格爾廳

宋老生未詳何處人以虎牙將帥兵三萬守霍邑唐兵至老
生與戰馬蹶被擒死之

霍州

右隋二人

張平高綏州虜施人隋末爲鷹揚府校尉戍太原爲高祖所
識因參謀議爲軍頭封蕭國公

史大柰本西突厥特勒入隋爲金紫光祿大夫後分其部於
樓煩高祖興太原大柰提其眾隸麾下桑顯和戰飲馬泉諸
軍却大柰以勁騎數百背擊顯和破之軍遂振授光祿大夫
從平長安以功多賞帛五千匹賜姓史從秦王平薛舉王世
充竇建德劉黑闥功殊等賜侍女三雜采萬段貞觀初攝

左武衛大將軍檢校豐州都督封寶國公食封戶三百卒贈
輔國大將軍

李思行趙州人嘗避魯太原高祖令赴長安還具論機變深
稱旨授左三統軍從破宋老生封樂安郡公卒謚襄

段志元齊州臨濟人父偃隋末爲太原司法書佐志元從父
客太原以剽果諸少年畏之甚爲太宗所識義兵起募得千
餘人授都督府軍頭從平霍邑絳郡皆爲先鋒突擊桑顯和
躡獲突厥通于稠桑封襄國公卒贈揚州都督謚曰忠壯

宇文歆武德初劉武周略汾晉詔歆以右衛大將軍助齊王
元吉守并州元吉喜獵夜潛出淫民家縱左右攘畜產歆類
諫不聽乃顯表於上言元吉與竇誕縱獵擾民不可與共守
元吉坐免

李大亮涇陽人貞觀八年爲河東道行軍總管有蜀渾山之捷威名大著

田仁會雍州長安人擢制舉仕累左武侯中郎將太宗征高麗而薛延陀以數萬騎掩河內詔與執失思力率兵擊敗之尾逐數百里延陀幾生得璽書嘉慰大遷勝州都督境有宿賊依山剽行人仁會發騎捕格夷之城門夜開道無寇跡累遷右衛將軍卒諡曰威

辛旻從李光弼定恆趙後署太原三城使史思明屯相州及滏陽旻逆擊走之後守河陽卒

烏承玘字德潤張掖人累立戰功李光弼表爲冠軍將軍封昌化郡王爲石嶺軍使王思禮爲節度使軍政倚辦焉

劉文英辛忠臣皆河東將大厯八年討田承嗣與賊將盧子

期大戰臨水破之

呂鳴岳河中都將張延英河中都虞侯李懷光拒命與判官高郢同謀間道上表及授密詔事洩遇害

馬良輔太原大將貞元十年監軍王定遠謀爲亂升堂刺節度使李說不獲馳至府門召集將吏於箱中陳勅牒官告示諸將曰有勅令李景略知留後遣說赴京公等皆有恩命指箱中示之諸將方拜拜良輔呼而麾眾曰箱中皆監軍舊官告非恩命也不可授但備急變爾定遠知事敗乃走召其部下將卒多不之應比夜墜城下幾死尋長流崖州大將高迪等同其謀說皆斬之

符令奇沂州臨沂人初爲盧龍軍裨將擊子璘奔昭義節度使薛嵩署爲軍副後田承嗣盜其地引爲右職田悅拒命馬

燧討之令奇密謂子璘曰吾閱世事多矣自安史干紀無噍類吾親田氏覆亡無時汝能委質朝廷爲唐忠臣吾亦名揚後世矣璘泣曰悅忍人也近禍可畏令奇曰今王師四合吾屬俎中醢兒今行吾死不朽不行吾亦死尸疊逆地云何璘俯泣不能對及悅使璘護送齊將李納璘與父嚙臂別與三子同出以三百騎降燧悅引令奇切讓令奇罵曰爾忘義且夕死吾教子以順殺身庸何悔鈞死愈爾遠矣遂遇害臨刑色不變年七十九贈戶部尚書

符璘字元亮令奇子降馬燧署爲軍副詔拜特進封義陽郡王旣聞父見害號絕泣血燧表其寃加檢校左散騎常侍賜晉陽第一區祁田五十頃燧討李懷光璘以五千兵先濟河與西師合從燧入朝爲輔國大將軍璘之降母匿里中獨免

及田說死詔迎至京賜宴別殿璘居環衛十三年卒贈越州都督

溫德彝河中都將太和四年從溫造誅興元亂卒

薛茂卿潞州將剽勇善戰謀歸王宰爲劉稹所殺稹誅詔贈博州刺史

石雄徐州人敢毅善戰黨項擾河西召隸振武劉沔軍破羌有勞會昌初回鶻入寇連年掠雲朔牙五原塞下詔雄爲天德防禦副使兼朔州刺史佐劉沔屯雲州沔召雄謀雄卽選沙陀李國昌及契苾拓跋雜虜三千騎夜發馬邑旦登振武城望之見鬪車十餘乘從者朱碧衣謀者曰公主帳也雄潛使喻之穴城夜出縱牛馬鼓譟直擣烏介帳可汗單騎走斬萬級獲馬牛羊不貲迎公主還進豐州防禦使武甯李彥佐

討劉稹逗留以雄爲晉絳行營諸軍副使時王宰屯萬善劉
沔屯石會關顧望莫先進雄受命卽勒兵越烏嶺破賊五壁
斬獲千計賊大震雄臨財廉賜與輒置軍門自取一匹縑餘
悉分士伍由是眾感發無不奮武宗喜曰今將帥義而勇罕
雄比者就拜行營節度使代彥佐徙河中稹危蹙其大將郭
誼密獻款眾疑其詐雄大言曰誼爲稹謀主今欲殺稹乃誼
自謀又何疑雄以七千人徑薄潞受誼降進檢校兵部尙書
徙河陽拜神武統軍卒

李筌河東節度虞侯將也嘗於嵩山石壁得黃帝陰符經注
以行世尤精兵家言注孫子並傳虎鈴經云

薛阿檀太原將中和初從李克用破巢賊收復長安復爲克
用前鋒破赫連鐸擒其將賈塞兒鐸奔遂取雲州

右唐十八人

案諸人職守多不能指一以年代相次以後同

上建立遼州榆社人爲代州虞侯將莊宗嘗遣女奴之代州祭墓女奴侵擾代人建立捕而笞之莊宗怒欲殺之明宗時爲刺史庇護之以免後封韓王

裴約濟州牙將也李嗣昭爲昭義軍節度使約以裨將守澤州嗣昭卒其子繼韜以澤潞叛降於梁約召其州人泣而諭曰吾事故使二十餘年見其分財饗士欲報梁仇不幸早世今郎君父喪未葬違背君親吾能死於此不能從以歸梁也眾皆咸泣梁遣董璋率兵圍之約與州人拒守求救於莊宗莊宗聞繼韜叛頗有憂色及聞約求救喜曰吾於繼韜何薄於約何厚而約能分逆順耶顧符存審曰吾不惜澤州與梁一州易得約難得也爾識機便爲我取約來存審以五千騎

馳至遼州而梁兵已破澤州約見殺

張廷蘊開封襄邑人事晉遷軍校李繼韜叛於潞州爲馬步軍都指揮使將兵爲前鋒至潞日已暮卽率兵百餘踰濠登城城守者不能禦遂破潞州明旦明宗與元行欽後至明宗心頗嫌之後歷絳州防禦使卒廷蘊素廉歷七州家無餘貲

右後唐三人

楊廷璋字溫玉正定人周初爲昭義兵馬都監世宗時鎮晉州有惠愛屢拔北漢堡砦置保安興同白壁等十餘砦遣監軍李謙溥知隰州合勢大敗并人世宗喜曰吾舅眞能禦寇詔褒之加檢校太保恭帝加檢校太傅宋初加檢校太尉吏民詣闕請立碑頌功德命盧多遜撰文賜之

張暉幽州大城人周廣順初爲晉絳步軍左廂排陣使宋初

從征澤潞爲行營壕砦使先登陷陣事平遷華州團練使建
隆二年太原未下詔入覲問計對曰澤潞經李筠之叛瘡痍
未復軍旅一興恐人力重困不若戢兵育民俟富庶而後爲
謀乃賜襲衣金帶鞍勒馬遣還乾德二年卒

曹彬字國華正定靈壽人周初爲河中都監蒲帥王仁鎬以
彬帝戚尤加禮遇彬執禮益恭公府譙集端簡終日未嘗旁
視仁鎬謂從事曰老夫自謂夙夜匪懈及見監軍矜嚴始覺
己之散率也顯德五年爲晉州兵馬都監一日與主帥暨賓
從環坐于野會鄰道守將走价馳書來詣使者素不識彬潛
問人曰孰爲曹監軍有指彬以示之使人以爲給已笑曰豈
有國戚近臣而衣弋絺袍坐素胡牀者乎審視之方信宋建
隆二年自平陽召歸遷客省使攻樂平縣降之建爲平晉軍

乾德初改左神武將軍遼攻平晉大敗之及平蜀亂囊中唯圖書衣衾而已六年同李繼勳等征太原爲前軍都監戰洞渦河斬二千餘級俘獲甚眾開寶二年親征復爲前軍都監率兵先往次圍柏谷降其將陳延山又戰城南薄于濠橋奪馬千餘及太祖至則已分砦四面而自主其北尋伐南唐不妄戮一人拜樞密使太宗加同平章事議征太原召彬問之彬言國家兵甲精銳弱太原之孤壘如摧枯朽太宗意遂決太平興國三年晉檢校太師從征太原咸平二年卒贈中書令追封濟陽郡王諡武惠

王廷義萊州掖人父景從張敬遠圍太原以所部歸晉開運中爲晉州巡檢使知州事周廣順中爲護國軍節度使宋初守太保封太原郡王卒追封岐王諡元靖廷義性勇敢善騎

射宋初爲內外馬步軍副都軍頭開寶二年從征太原親鼓士乘城獨免胄矢中其腦而顛經宿卒太祖甚惜之優詔贈建雄軍節度

翟守素濟州任城人愆漢周領承天軍使開寶中從征太原孫方進圍汾州監其軍九年詔與郭進率兵深入并人境蹈藉禾稼多所虜獲太宗初領憲州刺史雍熙四年知路州命爲代北方田都部署并州兵馬鈐轄瀉化中屯石州卒守素縣立內職五十餘年所至有治績

李崇矩上黨人宋初爲澤潞南面行營前軍都監破李筠眾于碾子谷澤潞平遣人先入城收圖籍視府庫後拜樞密使開寶初從征太原班師命爲後殿卒諡元靖

李謙溥并州孟縣人性慷慨通左氏春秋後周時嘗攝隰州

事濟城隍殿兵備并敵至謙溥登城徐步敵不敢動夜縋敢死士百餘薄敵營大破之開寶元年李繼勳征太原溥爲汾州路都監在州十年敵不敢犯百姓乂安遷齊州團練後邊將失律使爲晉隰沿邊巡檢邊民喜之

郭進深州博野人建隆初征澤潞爲洺州防禦使充西山巡檢與曹彬王全斌入太原獲數千人開寶九年爲河東道沂代等州行營馬步軍都監招徠山後諸州民三萬七千餘口太平興國初領雲州觀察使仍兼西山巡檢四年車駕將親征命分兵控石嶺關以防北邊遼人果犯關大破之又攻破西龍門砦俘馘來獻自是并人奪氣時田欽祚護石嶺軍恣爲姦利諸不法事進力不能禁屢形於言進武人性剛烈戰功高欽祚以他事侵之心不能甘自經死欽祚以暴卒聞上

悼惜久之進有材幹輕財好施在西山太祖遣戍卒必論之
曰汝輩謹奉法我猶貸汝郭進殺汝矣其御下嚴毅若此然
能以權道任人嘗有軍校自西山詣闕誣進者太祖詰知其
情狀遣使送與進令殺之會并人入寇進謂誣者曰汝敢論
我信有膽氣今能掩殺并寇卽薦汝於朝其人踴躍聽命果
致克捷進卽以聞乞遷其職從之太祖嘗曰進控扼西山十
餘年使我無北顧憂我親進豈減兒女耶

孔守正開封浚儀人開寶中從何繼筠大敗遼師於石嶺關
太宗征晉陽分主城西洞屋率步卒大呼先登繼與內侍蔡
守恩等率騎兵力戰并軍遂潰消化初領代州部署連移并
代夏綏麟府三鎮改代夏二州部署眞宗初復徙代州咸平
初守正上言四任雁門邊亭久安願東北以自效入胥壯之

趙延進瀘州頓邱人父暉周太子太師延進好學開寶中知河中府太平興國中平并州爲攻城八作據砦使嘗與崔翰等禦遼師于定賜陣圖分爲八陣陣去各百步延進力請改爲二陣前後相副遂大破之仕至右金吾衛大將軍卒

劉知信字至誠邢州人母卽昭憲后妹太平興國四年從征河東爲行宮使雍熙中有戰功四年爲并州路副都部署端拱中代還景德中卒贈太尉知信最爲舊故以循謹聞子承宗大中祥符中緣邊安撫

張煦字輔陽開封人太宗時以內殿崇班爲鎮定邢趙山西土門路都巡檢使遼騎兵剽境上煦以所部斬首數十走之葛霸周瑩李繼宣稱其幹舉有詔嘉獎復爲岢嵐軍使天禧三年以西上閤門使爲并州鈐轄請近郡卒

李允正謙溥子太宗時爲并州駐泊鈐轄俄代張永德知州事徙代州咸平初又爲并代馬步軍鈐轄駕駐大名與高瓌率大原軍出土門路來會召見便殿所部有廣銳騎士數百皆素練習命引入賜緡錢俄以兵會大名復還并代五年移陝西兩路尋復任并代鈐轄終鄜延部署

韓守英字德華開封祥符人從征河東數奉詔至石嶺關督戰取隆州厯并代路兵馬鈐轄遼圍岢嵐軍與鈐轄張志言知府州折惟昌帥所部渡河抵朔州以牽賊勢遂破狼水砦俘數百人獲馬牛羊鎧甲以數萬計賊爲解去賜錦袍金帶又爲并代路都鈐轄建言本路宿兵多百姓困於飛輓今幸邊郡無事請留騎軍千餘人悉徙內地眞宗曰邊臣能體朝廷恤民之意宜詔諸路視此行之後爲景福殿使延福宮使

卒

高繼勳字紹先瓊子咸平中遷洛苑使并代州鈐轄徙屯奇嵐軍遼兵五萬屯草城川誘令南伏兵寒光嶺大敗之遷弓箭庫使賜金帶錦袍徙麟府州鈐轄時屯兵河外饋運不屬繼勳扼免毛川援送軍食師乃濟累遷馬軍副都指揮使授建雄軍節度使卒贈太尉後追封康王謚穆武

張省字元弼開封人給事真宗藩邸累遷昭州團練使并代州鈐轄後坐事貶供備庫使潞州都監久之事稍辨復官上以耆厯河東稔邊事召至宣和閣問地里險易狀耆因言雲應蔚朔四郡間遣人以文移至并代間非覘邊虛實卽欲熟道路宜密諭代州使自雲應蔚至者由大石谷入自朔至者由土墮入餘間道皆塞之以示險東封遷絳州防禦使從祀

汾陰授威塞軍節度使晉宣徽南院使兼樞密副使罷復召
爲樞密使改節昭德封鄧國公明道初改節護國出外致仕
卒贈大師諡榮僖子利嘗知代州

王德用字元輔趙州人超子天聖中爲并代州馬步軍副都
總管累官知樞密院罷至和元年復以同平章事爲樞密使
與遼使耶律防同射於玉津園防曰天子以公典樞而用富
公爲相將相皆得人矣卒諡武恭

閻守恭榆次人明道中任并代鈐轄性沈勇御軍嚴嘗訪求
士大夫師法郭進事俸祿悉散於人在并州因春社會客曰
守恭大原一貧民耳徒步位刺史老復官鄉里踰分多矣今
日與卿輩訣後十日卒

任福字祐之河東人寶元中爲嵐石隰州緣邊都巡檢使既

辭奏曰河東地界大河斥堠疎濶願嚴守備以戒不虞上善
之後加忻州團練使尋知慶州兼環慶路副總管康定二年
戰歿於好水川贈武勝軍節度使兼侍中

王仲寶字器之密州高密人仁宗時爲澤潞晉絳慈隰威勝
軍巡檢使至官裁八日獲太行山宿賊八十人賜金帛緡錢
遷內殿承制後爲并代州鈐轄加西上閤門使建言緣邊博
羅屬羌苦之請寬法使得復業以捍邊境久之遷東上閤門
使元昊寇延州仲寶將兵至賀蘭谷以分兵勢敗蕃將羅逋
於長雞嶺後又以磁州防禦使知代州致仕卒

張致仁宗時并代副總管河東更鐵錢法人情疑貳兵相率
叩府欲訴幾爲亂致策馬往諭之皆散還營

郭恩開封人仁宗時以崇儀使爲并代州鈐轄管勾麟府軍

馬事戰敗於屈野河不屈死贈同州觀察使

郭遵開封人以左班殿直爲并代路巡檢累遷延州西路都巡檢使從劉平力戰歿特贈果州團練使遵用鐵杵槍槩共重九十斤

張岳字子雲府州谷人爲內殿崇班明鎬在河東以岢嵐軍當雲朔路奏岳爲麟府路駐泊都監兼沿邊都巡檢使駐岢嵐張亢修瀕河堡障初議置安壘砦于石臺神岳以爲非要害地遂徙砦於生地骨堆以扼賊左右親信曰擅易砦地可乎岳曰苟利國家得罪無憾也卒易之已而本道上言左遷絳州兵馬都監二州未解嚴復麟府駐泊都監屯安壘累遷洛苑使嘗從數騎夜入羌中偵機事旣還羌覺追之岳隨羌疾馳効羌語與羌俱行數里乃得脫前後中流矢創發卒

趙滋字子深開封人韓琦言眞將帥才薦授并代路鈐轄改
管勾河東經略司公事建言代州甯化軍有地萬頃皆肥美
可募人田作教戰射爲堡砦人以爲利終天武捧日四廂都
指揮使滋馭軍嚴簿書米鹽皆有條法而性尤廉謹月得公
使酒不以入家云

賈崑字民瞻開封人神宗時爲河東將敗西夏兵於明堂川
累功轉莊宅副使遷路都監紹聖中夏圍麟州神堂巖卽循
屈野河行且五里據北攔坡嶺一矢殪其酋加皇城使威州
刺史遷路鈐轄崑在行間二十年有智略能撫御士卒所嚮
輒勝入累遷步軍都虞候卒

何灌字仲源開封祥符人武選登第爲河東從事經略使韓
縝雖數試其才而常沮抑之不假借久乃語之曰君奇士也

他日當據吾坐爲府州火山軍巡檢盜蘇延福狡悍爲二邊
患灌親梟其首嘗申畫賈胡曠泉界遠人舉兵灌發輒中或
著巖石皆沒鏃敵斂去爲河東將與夏人遇鐵騎來追灌射
皆徹甲至洞胸出背疊貫後騎羌懼而引卻知甯化軍豐州
徙熙河又提點河東刑獄及梁方平守黎陽拜灌武泰軍節
度使河東河北制置副使靖康元年正月方平奔灌師遂潰
戰沒於汴城西

徐徽言字彥猷衢州西安人負氣豪舉喜談功名事大觀二
年賜武舉絕倫及第歷保德軍監押以邊功加闔門祇候平
陽府軍馬鈐轄權知保德軍政總領河西軍馬宣和四年定
天德雲內兩城宣撫使童貫嫉其功復棄去改知火山軍兼
統制河西軍馬徙赴石州靖康初遷武翼郎闔門宣贊舍人

金圍太原分兵絕饗道自隰石以北命令不通者累月徽言以三千人渡河一戰破之遷武經郎知晉甯軍兼嵐石路沿邊安撫使聶昌出河東爲金人所劫以便宜割河西三州隸西夏徽言率兵復取三州并取嵐石等州教戈船卒乘羊皮渾脫亂流以掩敵金人益備克胡砦吳堡津遣守領爲九州都統與晉甯對壘徽言出奇兵襲逐之時河東郡縣淪沒遺民日候大軍至徽言陰結汾晉土豪數十萬約復故地則奏官爲守長聽世襲條其事以聞候報可卽身率精甲擣太原徑取雁門留兵戍守且曰定全晉則形勝爲我有中原當指期克復投機一時會不可失奏上詔徽言聽王庶節制議遂格建炎二年冬金自蒲津涉河圍之時環河東皆陷獨晉甯屹然孤墉橫當強寇徽言遣沒人泗河召逃民幾萬眾浮筏

與金人鏖河上大小數十戰後裨校散外郭納金兵微言
兵挾以去不屈死之初微言與劉光世東髮雅故光世被命
援太原次吳堡津輒頓不進微言移書趣行不聽又諭以太
原旦暮望救總管承詔赴急不宜稽遲取方命罪光世猶前
卻微言卽露章劾其逗撓封副與之光世惶遽引道至是死
節事聞贈晉州觀察使諡忠壯

李翼宣和末爲代州西路巡檢使金取代遣使諭降翼射殺
招降者誓死士堅守圍急力不能支城被執怒罵不屈死
之

王稟靖康元年爲太原副總管六月賞城守之勞加建武軍
節度使及城陷死之

祁昂晉甯統制與徐徽言同被執不屈而死贈成忠郎團練使父翊宣和末知朔甯府救太原死於陣世著忠義云

賈亶汾州路兵馬都監與張克戩同死難

王忠植石州人紹興十年知代州舉兵復石代等十一州遂以爲建甯軍承宣使又爲河東路經略安撫使胡世將命救慶陽叛將趙惟清執之令降金不屈死贈奉國軍節度使謚義節

右宋三十三人

耶律懷義遼宗室金宗翰取西京天祚謀奔於夏懷義諫止之不聽乃竊取廐馬歸金命領謀克從軍天會初帥府以新降諸部大小遠近不一令懷義易置之承制以爲西南路招討使乃擇諸部衝要之地建城市通商賈諸部兵革之餘人

多匱乏自是衣食歲滋畜牧蕃息矣從宗翰伐宋降馬邑破
雁門屯軍進攻太原以所部別降清源縣徐溝鎮遂與諸將
別屯汾州之境時河東陝西路兵來攻太原劉光世折可求
柵於文水西山懷義捕得生口盡知宋兵屯守要害乃分兵
襲敗之明年從婁室取汾州及其屬邑遂過平陽出澤潞以
趨河陽所至皆絳七年還鎮十年改西北路懷義在西陲幾
十年撫御有恩及去老幼遮道攀戀數日不得發天眷初爲
太原尹治有能聲後封蕭王海陵末卒於雲中

完顏衷中都司屬司人世祖之曾孫也爲代州宣銳軍都指
揮使歲旱州委禱雨於五臺靈潭步致其水雨隨下人爲刻
石紀之後除順義軍節度使陞辭賜金幣特寵異之移鎮西
泰和六年致仕卒衷孝悌貞謹深悉金源婚禮婚嫁每令衷

相之治復有能稱

粘割貞西南路招討司人大定二十八年進士貞祐中歷汾陽軍節度使四年改昭義軍充潞州經略使興定二年權元帥左都監守晉安府三年十一月城破貞與府官十一人皆死之

納蘭胡魯刺大名路怕魯歡猛安人寡言笑好讀書承安二年進士第一除應奉翰林文字貞祐中遷絳陽軍節度使權河東南路宣撫副使是時兵興胡魯刺完城郭繕器械料才壯爲鄉兵延問耆老招致儒士咨以備禦之策鹽米儲備勸富民出粟郡賴以完賜詔褒諭加資善大夫官其次子吾申改權經略使被召以疾不能行卒於絳州

楊貞吉州人父椿常爲融州刺史貞擢明昌五年進士仕至

河東南路招撫吉隔便宜經畧使築牛心寨以禦元兵寨臨黃河貞以甯德及子克義監戰克義死之輿尸至貞嘆曰我以身報國子何足惜無何元兵復自邠延渡河圍吉安招撫張冲同知伍禮厚守之禮厚貞子壻也元兵夜攻吉安堡并牛心寨事急貞謂禮厚曰爾業進士致身五品亦欲降耶禮厚并其妻墜崖死之又謂子克敬克讓曰國事去矣吾不忍汝輩爲人虜相繼墜巖死之夫人孟氏自縊死貞朝服南望痛哭再拜赴河死後數日尸橫河上門人張安石收葬焉

與敦醜和尙爲代州經略使貞祐四年八月元兵攻代州和尙禦戰敗績身被數創就執不屈死

禹顯代州人以戰功授義勝軍節度使兼沁州招撫使元光初元兵攻河東顯扼龍豬谷擊破其眾擒元帥韓光國俘獲

甚眾後守襄垣與元兵戰於玉女寨大捷以內變城陷被擒
不屈而死

楊閻代人爲禹顯部將每戰必求副連以勞得官從顯守襄
垣與元兵相持五年進懷遠將軍同知沁南節度使分兵駐
銅鞮治柵北磧中招呼逋竄稍集元兵悉眾來攻閻行夜至
隘樓中敵偵刺手搏數人以死

耿昉束鹿人爲平定軍宣武指揮使性資沈雅才略博宏恤
軍愛民重學造士後占籍焉

右金九人

攸哈刺巴圖渤海人善射戊寅授金虎符河東北路兵馬都
元帥鎮太原修城池繕兵甲招降屬邑市肆不改遠近聞之
皆相率來歸嘗徵服夜出聞民間語曰吾屬父母子女相失

矣下令軍中凡俘獲有親者聽贖無貨者官爲贖之民得完
聚者畝庚辰金梁知府立西風寨奪耕牛哈刺巴圖殺梁知
府驅耕牛還又破隰州辛巳三月引甲騎十餘人救壽陽王
胡莊道三交大戰金兵遁五月金趙權府圍太原將騎三十
出西門金兵又遁癸未大敗金師於太谷縣甲申六月平凌
井寨乙酉二月清泉寨降石家昂亦降丁亥五月奸人夜獻
太原東門於武仙仙引兵入哈刺巴圖鏖戰仙兵大至諸將
自城門外呼曰當速出哈刺巴圖曰眞定史天倪平陽李守
忠隰州田雄皆失守矣我又棄太原將何面目見主上及國
王乎家屬任公等所俘吾誓與城存亡遂沒於陣太祖以其
子幼命其表弟王七十復守太原後又命哈刺巴圖長子莽
果台嗣守太原

安扎爾拓跋氏嘗扈從南征命領蒙古軍爲前鋒已卯河中府降兵北還以安扎爾領前鋒總帥仍統所部兵屯平陽以備金攝國王事金將紇石烈擁兵畏安扎爾威名不敢輕犯其境壬午金將侯小叔陷河中城元帥石天應死焉將趨中條安扎爾進兵擊之斬首數萬級免者僅十數癸未春至開喜縣西下馬村穆呼哩卒令安扎爾居守平陽甲午封功臣賜平陽戶六百一十有四驪戶三十獵戶四未幾卒

李伯溫守賢之孫毅之子也行平陽元帥府事鎮青龍堡及平陽陷弟守忠被執選驍勇拒守久之金人盡銳來攻守卒多夜遁李成導敵入伯溫登堞樓曰吾兄弟仗節擁麾受方面之寄今不幸失利當以死報國吾弟已被執我不可再辱汝等宜自逃生士卒尙不忍去伯溫卽拔劍殺家屬投井中

以刃植柱刺心而死金人登樓見伯温抱柱如生無不嗟歎
李守正伯温子爲平陽守活俘甚眾以功投河東南路兵馬
都元帥庚寅上黨晉陽攻汾州將陷守正赴援敵懼解去汾
州持牛酒迎犒者道不絕且泣謝曰幸公完是州德甚大願
奉是州以從關中兵屯吉州會領楊鐵槍以數千人叛出兵
捕之軒成據隰州守正往擊之中矢傷足及歸創甚會金完
顏合達攻平陽守正累瘡戰沒大帥以其兄守忠代之

李守忠守正兄官至河東南路兵馬都元帥兼知平陽府事
壬午冬平陽公胡景山以青龍堡來降丁亥夏四月援國王
安扎爾於洪洞會高梁師潰城遂陷金人執守忠至休誘以
高爵守忠罵之惡金人怒置鐵籠中火炙死

任志潞州人戊寅國王穆呼哩略地潞州志迎降授以虎符

俾充元帥收集山寨數與金兵戰有功金嘗擒其長子如山招之志曰我爲大朝帥豈愛一子親射其子殪之穆呼哩嘗召諸將議事志亦預徵道經武安縣已反爲金志死之國王令其子存襲

任存襲父職潞州元帥庚寅金將武仙攻潞州存戰死辛卯正月有旨潞州元帥任存妻孥家屬令有司贖給仍賜第以居之十一月以存父子死事子立尙幼先官其姪成爲潞州長官待立長還授之成卒授立潞州長官佩金符後懋懌州尹

劉伯林濟南人好任俠善騎射金末爲威甯防城千戶壬申太祖圍威甯伯林以城降卽以金都提控原職授之命選士卒爲一軍招降山後諸州太祖北還留伯林屯天城邊金兵

前後數十戰進攻西京錄功賜金虎符充西京留守兼兵馬副元帥戊寅從攻下太原平陽已卯破潞絳及火山聞喜諸州縣時欲徒聞喜民實天城伯林以北地人艱食力爭止之部曲俘獲萬計悉縱之在威甯十餘年務農積穀與民休息隣境凋瘵而威甯獨爲樂土語人曰吾聞活千人者後必封吾所活何啻萬餘人子孫必有興者辛巳以疾卒累贈太師封秦國公謚忠順

杜豐字唐臣汾州西河人少有大志通兵法仕金爲平遙義軍謀克率所部來附從國王安扎爾攻平陽克絳州解州諸堡招集流民三萬餘家金人南遁遂以豐守河北從下懷孟破溫谷木澗等寨及洪洞西山賊墜崖死以萬計金將武仙等抄掠授河東南北路兵馬都元帥便宜行事遂破玉女割

渠等寨從攻益都金首將突圍出豐戰扼之益都下遂略地登萊降島民萬餘以本部取沁州由是銅鞮武鄉襄垣絳上沁源諸縣皆下復撫定平陽太原真定及遼沁未降山寨所至悉平擢沁州長官在州十餘年寬徭薄賦勸課農桑民以富足後請老卒於家沁人立祠祀焉子思敬世祖至元中累遷侍御史

趙全平陽襄陵人氣宇英邁有膽智金末羣盜起挈家據縣山之陽日從數百人事射獵元太祖南下率眾歸附從國舅下正定沼磁銅臺諸郡以功擢副元帥安撫沁州治績用成卒於官

樊天勝定襄人以武功授九原府元帥金常山軍武仙取忻州大帥怒其民欲盡戮之天勝哀訴得免

劉璧忻州人歷郡首選本州兵馬都總管知府事涖政仁賢
吏民畏服

楊士衡清涼軍團練節度使天資孝友敏而勤學

劉亨范陽人元初以功充行軍副總管時河東被兵之餘民
物空竭上言建國以民爲本今河東殺掠殆盡收存恤亡此
其時也會以絳州邊地難其人授亨絳州節度使兼行帥府
事卒於師無子兄德仁襲職金將移刺副樞攻絳州城陷死
之

察罕特穆爾穎州沈邱人幼篤學嘗應進士舉有時名身長
七尺修眉覆目左頰有三毛怒則毫直指平居慨然有當世
之志至正十六年以平賊累官兵部尚書時知樞密院事都
魯節制河南軍調察罕與李思齊討陝西賊察罕鼓行而西

提兵援靈寶賊渡河陷平陸掠安邑蹂晉南鄙察罕追襲之
賊回扼夏陽津赴水死者甚眾十七年城陷商州攻武關趨
長安分道掠同華諸州三輔震恐察罕領大眾入潼關殺獲
以萬計餘黨潰散關中悉定十八年朝廷徵四方兵入衛詔
察罕以兵屯涿州察罕卽留兵戍清湫義谷屯潼關塞南山
口以備他盜自將銳卒赴召而曹濮賊方分道踰太行焚上
黨掠晉翼陷雲中鴈門代郡烽火數千里復大掠將南還察
罕先遣兵伏南山阻隘自勒重兵屯聞喜絳陽賊果走南山
縱伏兵擊之賊皆棄輜重走山谷其得南還者無幾乃分兵
屯澤州塞碗子城屯上黨塞吾兒谷屯并州塞井陘口以杜
太行諸盜賊屢至守將數血戰擊卻之河東悉定復定河南
以兵分鎮關陝荆襄河洛江淮而重兵屯太行營壘旌旗相

望數千里修車船繕甲兵務農積穀訓練士卒謀大舉以復山東先是山西晉冀之地皆察罕所平定而都魯之子曰博囉以兵駐大同因欲並據晉甯遂至兵爭天子屢下詔解和之終不聽二十一年察罕與疾自陝抵洛大會諸將與議師期發并州兵出井陘遼沁軍出邯鄲澤潞軍出磁州懷衛軍出白馬及汴洛軍水陸俱下進逼濟南城而齊河禹城俱來降南道諸將亦報捷東至海濱郡邑聞風皆送款下濟南詔拜中書平章政事知河南山東行樞密院事六月田豐王士誠陰結賊復圖叛田豐之降也察罕推誠待之數獨入其帳中及豐既謀變請察罕觀營左右請以力士從不許輕騎十有一人行至王信營又至豐營遂爲王士誠所刺計聞朝廷震悼公卿及京師四方之人不問男女老幼無不慟哭者追

封穎川王謚忠襄以子庫庫拜太尉中書平章事總父兵庫
庫既領兵柄銜哀討賊攻誠益急十一月拔其城執其渠魁
陳孫頭二百餘人獻闕下而取田豐王士誠之心以祭其父
餘黨皆就誅山東悉平

庫庫特穆爾沈邱人察罕特穆爾之甥幼養以爲子察罕特
穆爾沒博囉特穆爾數以兵爭晉冀至正二十三年庫庫特
穆爾駐太原二十五年以兵搆大同取之博囉特穆爾伏誅
詔封河南王總天下兵於是分省以自隨而用孫奭趙恒爲
謀主二十七年緡高關保等列其罪攻之十月詔落太傅中
書左丞相諸軍在山西者命薩藍托里領之庫庫特穆爾退
軍屯澤州二十八年命左丞孫景益分省太原關保以兵爲
之守庫庫特穆爾遣兵據太原又下詔削奪退守平陽關保

遂據澤潞二州與摩該合七月額高關保攻平陽掩擊擒之
閏七月詔復河南王太傅中書左丞相尋自平陽退守太原
又西奔於甘肅明洪武八年卒

關保河南人至正間爲平章察罕裨將時晉冀盜起調禦澤
潞與招討萬戶虎林赤展築城垣併力守禦盜據澤及高平
整兵勦之盜幾盡杏城盜首劉子才復侵澤潞亦設奇勦之
功聞進侍郎仍賜龍衣金帛有差值旱蝗秋復大水徧禱山
川回歉爲豐民獲安堵尋以攻汴功加山東樞判同僉院累
增級左轄

虎林赤招討萬戶澤潞左轄佐守禦之責勵協恭之誠遂建
奇功終昭令譽

時公權任吉陽二州統兵官河南中書行省右丞課士撫民

教養移俗練兵設備恩威兼濟嘗禦寇炳七寨爲時保障二郡賴之

楊文選河南人至正間鎮守靈石公廉慈惠士民愛之爲立頌德碑

右元二十人

汪興祖巢縣人洪武元年以都督兼右率府使西取大同將三衛卒守之再敗敵兵斬獲無算進克武朔二州獲知院馬廣等命爲晉王武傅兼山西行都督府僉事三年冬封東勝侯四年伐蜀中飛石死

王志臨淮人洪武元年以六安衛指揮使從渡河取懷慶澤路留守平陽會大將軍徐達軍西征三年封六安侯復留守平陽率兵出察罕諾爾塞還鎮平陽復領山西都司衛所軍

務上稱其處置得宜卒追封許國公謚襄簡

章存道龍泉人御史中丞溢之子也溢集義兵存道撫其眾
遂成練卒授處州衛指揮副使洪武三年守平陽轉左衛指
揮同知已從湯和北伐守哈敦不刺營五年從和征陽和遇
敵於斷頭山力戰死之

陳質建文初以參將守大同中軍都督同知助宋忠保懷來
忠敗退守大同代王欲舉兵應燕質持之不得發燕師攻大
同堅守不下蔚州廣昌附於燕旋復取之永樂初被害

朱榮字仲華沂州人永樂十二年冬以左都督充總兵官鎮
大同修忙牛嶺免毛河赤山榆楊口東勝諸城寇不敢近居
三年詔還封武進伯佩征虜前將軍印卒贈侯謚忠靖

鄭亨合肥人大興左衛副千戶靖難兵起從破紫荆關掠廣

昌取蔚州直抵大同封武安侯仁宗初拜征西前將軍鎮大同墾田積穀邊備繕完自是大同希寇患宣德間再鎮大同轉餉宣府招降酋長四十九人請于朝厚撫之歸附者相屬九年卒亨嚴肅重厚善撫士恥捨克大同鎮守中官撓軍政據理裁正其人不悅然其卒也深悼惜之贈漳國公謚忠毅陳懷合肥人襲父職正定副千戶永樂中晉都指揮使涖山西都司事正統二年以左都督鎮大同時漠北人進貢者日給廩餼爲軍民害言于朝得減省後封平鄉伯死于土木贈侯謚忠毅

周安鳳陽人襲振武衛指揮僉事宜德間從征交趾奮勇深入殺賊數十人賊益眾圍之格鬪死于陣弟讓等十二人俱戰死事聞憫其忠遣進士王奎諭祭

方政全椒人製濟陽衛千戶宣德十年爲大同總兵官中官郭敬誣政專擅楊士奇等言政勤廉公正善撫士敬貪黷其言誣也乃降勅責敬秋劾副總兵曹儉罪奪其職正統元年上言征調軍士應支口糧行糧者不當減其月糧軍餘墾地已許免稅不當復徵屯田歉收請量蠲免詔竝允行晉右都督四年討麓川力戰死贈威遠伯謚忠毅

朱冕沂州人榮之子也嗣武進伯宣德中以晉王濟熿新廢命鎮山西正統四年佩征西將軍印充總兵官鎮大同九年出塞捕寇十四年北征戰于陽和死之謚忠愨

許貴字用和江都人襲父成永新伯以武進伯朱冕薦爲山西行都司督操大同諸衛士馬久之守備大同西路也先入從石亨戰陽和渡口敗績貴力戰得還時貴當敵衝人心尤

恂懼激戰士以忠義敵來擊敗之進都指揮使景泰元年春
充右參將敵寇威遠追敗之蒲州營奪還所掠人畜敵萬騎
逼城下禦卻之再遷都督同知大同乏馬命求民間得八百
餘匹所司不給直貴爲請乃予之嘗募死士入敵壘劫馬百
餘悉昇戰士皆樂爲用分守中官韋力轉淫虐眾莫敢言貴
獨劾奏三年遷京天順五年卒

周于爲山西指揮使禦寇死獲贈卹

郭登字元登武定侯英孫好談兵工詩明武將無及者正統
十四年車駕北征扈從至大同拜都督僉事充參將佐總兵
官劉安鎮守及旋師登告學士曹鼐等駕宜入紫荆關王振
不從遂及於敗時大同軍壘蕭條城門盡閉人心洶洶登慷慨
奮勵修城堞繕兵械撫循士卒弔死問傷親爲裹創傅藥

曰吾誓與此城共存亡矣也先擁駕至閉門不納英宗遣人謂登曰朕與登有姻何拒朕若是登奏曰臣奉命守城不知其他景帝初進都督同知充副總兵尋代安爲總兵官也先入將所部入援先馳蠟書奏至敵已退上褒答之進右都督卻敵城下上用兵方略十餘事景泰元年春敗敵於沙窩以八百騎破數千人封定襄伯四月又敗寇於土城六月再卻寇鎮守中官陳公與登構上遣人代公還登愈感奮及英宗遣代王頌登功云有自敵中來者言其初計欲取大同爲巢穴故數來攻及每至輒敗有一營數十人不還者敵氣懾遂奉駕還乞降勅獎勞兵部言登已封伯乃止二年以老疾乞休舉石彪自代不許時沈固在大同久事多廢登劾奏之而薦尙書楊甯布政使年富又言大同既有御史又有巡按

御史僉都御史任甯宜止巡撫宣府上悉從之遂以富代固而徹固及甯還總兵孫鏜與登互訐詔切責鏜已勅登與鏜兩戒之秋以疾召還成化中提督十二團營卒贈侯謚忠武劉璽字廷玉遷安人襲開平衛指揮使習兵書善騎射充右參將分守陽和勅部兵三千訓練聽調成化十六年從王越征威甯海子進都指揮使十八年戰黑石崖有功進署都督僉事遷大同副總兵十九年秋亦思馬因入璽守懷仁聞總兵官許甯失利亟遣兵援大呼陷陣與子鵬力戰圍乃解以功予實授尋以右副總兵分守代州兼督偏頭諸關請易鎮守總兵銜上曲從之宏治中佩征西將軍印卒

劉甯字世安山陽人襲永甯衛指揮使成化十八年爲左參將分守陽和十九年秋亦思馬因圍大同總兵官許甯於夏

米壯甯援兵至敵乃退無何復入掠甯將兵三千連敗之聚
落站白登柳林小鴉鶻峪時諸將多失利許甯以下獲罪甯
超遷都督同知改左副總兵協守大同與偏頭關總兵周璽
竝著功北邊稱名將時入貢數萬人懷異志甯率二十騎直
抵其營眾駭愕有部長勒馬引弓出甯前下馬與諸部長坐
舉策指畫宣威德一人語不遜甯搦其面奮臂起其長叱之
退甯復坐與語呼酒勸飲皆感悟卒如約宏治十三年大同
告警命爲副總兵從平江伯陳銳禦之銳無將略與甯不協
止毋戰坐停半俸閒住尋還全俸卒贈廣昌伯

莊鑑遼東人襲遼右衛指揮使驍猛有膽決遇賊輒奮成化
十九年爲大同西路參將亦思馬因入邀其歸戰牛心山寇
遂遁鑑所部無亡失資銀幣後鎮宣府以才與大同總兵官

張俊易鎮卒

張俊宣府前衛人嗣世職指揮使累擢大同游擊將軍宏治十二年以功進都指揮同知火節入左衛尋卻三萬餘騎上大喜立擢都督僉事未幾總兵官王璽失事被徵卽命俊代冬以寇入戴罪後進同知卒

馮徵綏德衛人宏治末署指揮僉事守備偏頭關正德七年勦流賊力戰洛南死贈洛南伯明年是日徵死所風霾大作又明年亦如之建祠

杭雄字世威世德衛總旗提延綏游擊將軍偕副將安國破敵尙嵐武宗幸宣府大同雄扈從卽拜大同總兵官上嘗見雄毳帷敝甚曰老杭窮乃爾寇至上將親擊雄叩馬諫曰主人畜犬盜至不吠奚用犬爲願聽臣等效力上笑而止嘉靖

初汰傳奉官獨雄以方守邊命署都督僉事鎮守如故後佩平虜大將軍印閒住卒雄歿戰時西北名將馬永下稱雄

王鑑蔚州人世襲中右所正千戶正德中從游擊將軍許甯征延綏至沙羅堡倉卒與賊遇鑑奮勇先登率所部大呼乘之殺傷過當力竭援兵不繼遂死贈懷遠將軍子以原官進一級

安國字良臣綏德衛人通春秋子史後襲世職指揮僉事正德三年中武會舉第一爲右副總兵協守大同徙延綏十一年冬寇二萬騎分掠偏頭關諸處國偕游擊杭雄馳敗之尙嵐州斬首八十餘級獲馬千餘匹寇遂遁進都督同知卒謚武敏

陳經正德間以太原左衛指揮任甯武守備少有大節善騎

射博涉經史工書畫事繼母以孝聞洺官值邊警率所部奮
勇力戰歿於陣贈昭勇將軍立祠春秋祀之

李冰容城人由保定後衛指揮僉事累進山西總兵官寇四
入驢皮砦諸處冰及游擊史畧禦卻之寇再闢三關冰拒險
不得入俄突神池利民堡迎戰於野豬溝驅之出境進署都
督同知以援河曲老營堡稍後停俸嘉靖三十二年寇犯大
同壁永安堡寇得利去尋復自大同入山西巡撫趙時春帥
師至廣武聞有零騎欲親擊之冰力諫不從追及於大蟲嶺
伏兵四起冰太息謂時春日公急去吾死此時春奔寇欲追
之冰殊死遮擊與子松及游擊李柱參將馮恩守備孔賓高
遷指揮陳金尹忠俞輝皆戰死一軍盡歿贈冰少保左都督
謚忠愍蔭子世指揮使立祠于祭葬松亦贈指揮同知恩以

下賄卹有差

高鵬山東人嘉靖間任太原營參將標兵王慶等作亂謀院門前巡撫踰垣避之鵬聞變披衣起坐堂上叛卒適至羅拜階下曰我輩計出無聊願戴將軍爲主鵬以大義反覆開導不聽乃厲聲曰吾王臣甯守義不爲汝曹主也叛卒知不可奪遂殺之時嚴氏在朝以危法中人寵賂滋章當事者惴惴方藉口以自解免終無白鵬死事者然晉人至今稱鵬忠義不去口

張世忠字顯甫山海衛人嘉靖五年舉武會試爲大同參將拒寇丁家莊有斬獲功二十一年爲山西參將七月寇屯祁縣與副總兵段堂等合五營兵襲之堂軍潰於陸支村世忠力戰死贈左都督謚忠愍立祠致祭時百戶張宣張臣亦死

並子卹而堂等胥論死

王世臣太原人嘉靖間任灰溝營守備套寇自陝西潰邊入犯世臣率其弟遇之於水橋峽眾謂眾寡不敵宜稍退以避其鋒世臣不聽奮勇直前兄弟同死于敵于總李虎亦力戰沒後七年寇自唐家會入把總徐堯臣率眾奮擊面中六矢身被七創猶鏖戰不退遂沒于陣

丁瑋爲山西副總兵嘉靖二十年寇犯甯武關石湖嶺大戰死之贈卹如制

焦澤大同後衛人剛毅有謀先以游擊從總兵周尙文戰彌陀戰鳳凰斬獲甚眾嘉靖間總兵大同邊疆甯謚後鎮昌平掌團營握兵最久家無餘貲助勞茂著無有繼者

張達涼州人目不知書慷慨負奇節膂力絕人嘉靖中充延

設遊擊將軍吉囊俺答大入山西達赴援數遇寇殺傷相當
被圍嵐縣力戰得出果擢署都督僉事充山西總兵官駐甯
武寇大入太原朔州縣三十八速繫獄兵部尙書毛伯溫言
達善撫士卒被逮之日部曲攀號如失慈母請令立功須後
效不從二十三年給事中戴夢桂請釋達命赴軍前立功卻
置鐵裏門後以總兵官鎮大同俺答入巡按御史胡宗憲趣
戰達素勇敢好離營繞鬪挺身陷陣寇圍數匝副總兵林椿
援之胥戰沒贈左都督諡忠剛立祠賜祭葬二子世傑世授
血戰潰圍蔭指揮僉事

周尙文字彥章西安後衛人多謀略精騎射襲指揮同知嘉
靖中起山西副總兵寇由偏頭關趨岢嵐轉戰三百里破之
與其子君佐俱傷賚銀幣二十一年秋又以總兵官鎮大同

請增餉及馬兵部議格之而尙文與巡撫趙錦不協乞休弗
允御史王三聘請移他鎮廷議大同敵衝尙文假此避耳乃
移錦甘肅吉囊數萬騎犯前衛有黑山涼城之捷進右都督
已寇由宣府入出大同塞而北尙文逸之稍有俘獲後寇復
大舉犯鵝鴿峪將南下尙文備陽和遣騎四出邀寇寇遁賜
敕獎勞之總督翁萬達議築邊牆自宣府西陽和至大同關
山口延袤二百餘里以屬尙文乃益築陽和以西至山西鴉
角山凡四百餘里敵臺千餘斥屯田四萬餘頃益軍三千有
奇上嘉其功進左都督加太子太保叛人充灼召小王子寇
邊尙文偵得其使者加太保蔭子錦衣世千戶時諸邊歲受
寇患大同尤甚自尙文泄鎮與總督萬達巡撫詹榮規畫戰
守邊民息肩者數年尙文益招叛人孤敵勢歸者相屬二十

七年八月寇國指揮顧相等於彌陀山出援之解其圍又勝於野口而還旋以大同兵援宣府勝於曹家莊錄功兼太子太傅賜資有加其年卒尙文得士死力善用問故所向有功自二十年後俺答類擾邊宿將王效馬永梁震皆前卒惟尙文存威名最盛及卒嚴嵩父子格卹典不予穆宗初贈太傅諡武襄

梁震新野人廉勇善訓士嘉靖中充陝西總兵官進右都督十五年移鎮大同大同卒數亂繼李瑾者魯綱威不鎮兵益驕廷議以爲憂移震往震素蓄健兒五百人至則令軍中曰我無爾陵爾無我叛健兒輩又時時恐喝鎮兵鎮兵素憚震由是帖服寇入犯震破之牛心山斬級百餘寇憤駐近邊伺隙時車駕祀山陵震伏將士於諸路寇果入大破之宣甯灣

又破之紅崖兒斬獲甚衆進左都督毛伯溫督師與震修鎮邊諸堡不數月功成卒贈太子太保賜其家銀幣加贈太保諡武壯震前後百十戰未嘗少挫時率健兒出塞劫敵營及卒健兒無所歸守臣以聞編之伍邊將猶得其力代震者祝雄遼東人自山西副總兵移鎮大同雖被劾解職而以善撫士聞後鎮薊卒薊人祠之

殷尙質天津衛人襲指揮僉事歷太原大同參將嘉靖三十二年督軍解巡撫侯鉞圍摧副總兵後戰沒廣甯

岳懋陝西人嘉靖三十三年爲大同總兵官五月懋巡邊中敵誘指揮薛泰諫不聽追擊至青圪塔陷伏中戰死泰已奪圍出太息曰主將死我何用生復陷陣死之贈懋左都督諡壯愍立祠蔭子泰亦贈蔭耐享懋祠

芳字德馨蔚州人十歲爲寇所掠潛自亡歸周尙文鎮大同奇之署爲隊長數禦寇有功嘉靖二十九年授陽和衛總旗職威遠斬級九十禦寇新平堡復有功無何戰泥河大磧之累遷指揮僉事三十六年守宣府寇大入山西芳一日夜馳五百里及之七戰皆捷隆慶元年山西總兵申維岳等敗於石州伏誅而副將田世威參將劉寶繫獄芳乞寢蔭子爲二將曠御史王沂劾之時大同被寇視宣府尤甚總督陳其學令總兵官趙嵐扼紫荆關寇乃縱掠懷仁山陰間嵐坐貶三秩遂調芳與易鎮俺答犯老營堡總兵郭琥堅壁待寇遂趨應朔芳亦嚴爲備乃西攻平虜城參將張剛厚遺之令移犯威遠幾破會其學率胡鎮等救而芳軍亦至相拒十餘日乃走芳謂諸將曰大同非宣府比與我間一牆耳寇不時至

非大創之不可乃將兵出右衛戰威甯海子破之萬曆中卒
芳戰朔州登鷹窠鴿子堂大沙灘暨宣鎮未嘗不大捷威名
震邊陲爲一時將帥之冠

趙尙榆林人以左副總兵協守大同嘉靖三十二年再遇辛
愛眾後復署大同副總兵事隆慶時鎮大同常督將士搗巢
獲首功又大敗寇兵宏賜堡被賚蔭子千戶萬曆初僉晉中
府卒

陳鳳榆林人襲世蔭嘉靖二十八年代周尙文爲大同總兵
官寇直抵甯武追至鶴兒嶺戰二日寇遁坐失事奪職薦起
固原游擊三十二年七月援浮圖峪大戰移日寇疾馳遁進
署都督僉事賜賚有加三十六年三月戰沒常樂堡

吾一奎宣府人左衛副將嘉靖四十年邊寇屬堡一奎冒矢

石親斬十餘級解去

曹應爵嘉靖間任鎮西衛副千戶敵騎入寇應爵率部兵二百人堵戰青草峒口有潛伏者見之惶懼將越牆去應爵遽前持其足左右競射之誤中頰死

崔世榮爲大同參將嘉靖四十五年冬寇犯威遠衛世榮以兵二百禦之與子大朝大賓俱死焚皮嶺獲贖卹

孫剛蔚州人嘉靖中以世襲指揮僉事守備永甯懷仁有警剛督兵赴之時縣故無兵而剛所統又甚寡敵前後至者且數萬人剛慷慨誓士期與城共存亡城破遂以身殉事聞諭祭二壇進其子二級

邵定左衛人任三關遊擊戎騎大舉入寇定領兵截殺日暮入草垛山堡被圍數日食盡死之

郭琥字宗器永昌衛人由總旗積首功隆慶時爲大同副總兵又任山西尋代馬芳鎮大同以貢市功累進右都督萬曆十一年以老乞休進都督致仕卒琥與趙尙皆宿將知名琥潔廉好籌畫識軍進止

李如松字子茂鐵嶺衛人甯遠伯成梁長子也驍果善戰少從父請兵機萬曆十一年爲山西總兵官給事中黃道瞻等數言如松父子不當並居重鎮大學士申時行請保全之召僉書右府十五年鎮宣府復與山西李迎恩更鎮其後軍政拾遺給事中閱視數遭論劾上終眷之不爲動後平甯夏朝鮮二十六年搗土蠻巢力戰死諡忠烈

馬林芳子由蔭累官大同參將萬曆二十年順義王扯力克襲獻史車二部長林以制敵功進副總兵四十七年殉開原

李熙大同右衛人沈毅有謀以昌平總兵掛征西大將軍印鎮大同先是萬厯間爲薊鎮裨將與士卒同甘苦傷者撫死者葬軍士咸德及鎮大同會當款後訓練士卒常若有事召入掌後軍都督府

魯欽長清人萬厯末爲山西副總兵天啟中爲貴州總理勇敢善戰名冠西南諸將六年禦安邦彥殉節

楊仲業爲山西總兵官天啟中改選總兵官父子並戰死贈都督同知

滿桂蒙古人家宣府勇敢便騎射爲督師大學士孫承宗所知累遷掛印總兵官賜尙方劍加太子太師崇禎元年十月大同總兵渠家楨失事以桂代之大同久恃款弛備插部西侵順義王遂入境大掠家楨及巡撫張翼明論死插部遂挾

賞不去桂至徧歷八路七十二城堡大修守備軍民恃以無
恐二年正月帥五千騎入衛十二月拜武經略戰沒贈少師
建祠

曹文詔大同人勇毅有智略崇禎中爲延綏副總兵賊渠王
嘉允久據河曲四年四月克其城嘉允南走追斬之陽城南
山又擊斬點燈子於稷山擢總兵官五年關中巨寇略盡賊
見陝兵盛多流入山西其魁紫金梁混世王姬開鎖八大土
曹操闖場天興加哈利七大部多者萬人少亦半之蹂躪汾
州太原平陽御史張宸極言賊自秦中來秦將曹文詔威名
夙著士民爲之謠日軍中有一曹西賊聞之心膽搖且嘗立
功晉中而秦賊滅且盡宜勅令入晉協勦於是令陝西山西
諸將並受節制六年正月敗賊於霍州孟縣壽陽二月斯混

世王於碧霞村又敗賊於方山臺孟忻壽賊盡平巡撫許鼎臣命軍平定備太原東張應昌軍汾州備太原西文詔連敗賊太谷榆社太原賊幾盡上以文詔功多勅所過地多積糗糧以犒并勅文詔速平賊監視中官劉中允言文詔躬賊徐溝孟定襄所司不給米反以礮石傷士卒卽下御史按問閏三月又大敗賊於澤州賊走自沁水潛師邀擊之斬首千餘四月夜半禦賊於澤之潤城斬千五百級又敗紫金梁老回回于武鄉過天星於高澤山又敗賊於黎城五月遣中官孫茂霖爲內中軍又敗賊於沁水擒其魁大威又敗之遼州毛嶺山西賊既累敗乃避文詔鋒多流入河北命移師往討初文詔在洪洞忤里居御史劉令譽及是令譽按河南語復相失文詔拂衣起而叱之令譽遂以石砭土官馬鳳儀之敗劾

文詔部議調大同七年七月全懷仁城十一月與制撫並充軍邊衛山西巡撫吳甦文詔知兵善戰請用之晉中乃命爲援剿總兵官立功自贖時部議勅馳剿河南甦抗疏力爭請令先平晉賊後入豫不許而文詔以甦有恩取道太原爲甦所留會賊高加計已殲乃整兵南八年六月戰歿於陝真甦之湫頭鎮贈太子太保左都督建祠春秋致祭文詔忠勇冠時稱明季良將第一其歿也賊中爲相慶云

艾萬年米脂人由武學生從軍積功至神木參將崇禎四年從曹文詔復河曲又從文詔連敗賊點燈子於桑落鎮花地窟露露山五年山西告警又隸文詔東征與李卑一月奏五捷又與賀人龍敗八大王掃地王兵六年賊將東遁連破之延家山亢義村買寨村擢副總兵七年正月捕殺王豹五與

其黨領兵王生擒翻山勦姬開鎖掌世王給事中張第元請錄萬年功萬年適以疾歸後戰沒於甯州之襄樂

虎大威榆林人勇敢嫻將略累官山西參將崇禎三年冬從總兵尤世祿擊王嘉允於河曲力戰被傷五年從總督張宗衡勦賊陵川憐安陽城沁水連勝之六年殲九條龍於介休又自舉落山東入屢取賊尋移守平陽七年巡撫吳甡察諸將中惟大威與猛如虎沈毅可屬兵事委任之冬扼賊渡河八年三月射殺高加討甡薦大威如虎二人忠勇進大威副總兵冬以扼賊功加署都督僉事十年春代王忠爲山西總兵官疏言諸將討賊零級不可取生口不可貪封域不可限上採納之十一年兵部甄別以稱職增秩十四年中殲死於汝甯大威爲偏裨最有聲卒死王事

劉光祚字洪基榆林衛人崇禎三年爲汾州參將五年勝賊張有義于臨縣軍復敗旋復臨縣六年擊斬隔溝飛撲天虎于石樓又敗撲天飛于臨縣加署都督僉事爲山西副總兵復崞縣城八年賊渠活地草見其黨劉浩然高加討破滅僞乞降光祚伏兵斬之活地草卽賀宗漢也晉中羣盜皆盡十四年南陽陷殉城

猛如虎塞外人家榆林積功至遊擊崇禎五年敗邢紅狼解高平圍六年敗姬開鎖於壽陽又從曹文詔斬混世王破來遠寨范村賊又擊殺九條龍勦交山皋樂山賊山西警漸息七年誅五條龍於沁源如虎驍果善戰與虎大威齊名許鼎臣識君恩吳姓相繼爲巡撫並委任之以功進參將冬扼河濱八年二月斬劇賊高加討山西賊盡平姓薦加副總兵冬

以防河功加署都督僉事連歲防河及援勦河南勞績甚著十四年南陽陷衝擊賊堪死

李輔明遼東人崇禎十二年爲山西總兵官被劾罷十六年冬戰歿於甯遠贈左都督列壇前屯祀之

曹變蛟文詔從子也幼從文詔以功歷遊擊崇禎四年從復河曲文詔移山西從戰輒勝及文詔改鎮大同山西巡撫許鼎臣言晉賊紫金梁雖死老回回過天星大天王蝎子塊關塌天諸渠未滅變蛟驍勇絕人麾下健兒千百才乃文詔亞乞留之晉中從之七年文詔困大同又自湖廣命北援七月力戰廣武守備王國棟陣亡事定言官劾其冒功上不問冬文詔謫戍變蛟亦以疾歸後爲東協總兵官十五年二月殉城於松山贈太子少保

周遇吉錦州衛人少有勇力好射崇禎中累功至京營前鋒營副將加太子少保左都督十五年冬山西總兵官許定國論辟以遇吉代之至則汰老弱繕甲仗練勇敢一軍特精十六年十二月李自成陷全陝將犯山西遇吉以沿河千餘里賊處處可渡分兵扼其上流以下流蒲坂屬之巡撫蔡懋德而請濟師於朝遣副將熊通以二千人來赴十七年正月令通防河會平陽守陳尙智已遣使迎賊諷通還鎮說降遇吉叱之曰吾受國厚恩甯從爾叛逆且爾統兵二千不能殺賊反作說客耶立斬之傳首於京至二月七日太原陷懋德死之賊遂陷忻州圍代州遇吉先在代遇其北犯乃憑城固守而潛出兵奮擊連數日殺賊無算會食盡援絕退保甯武賊亦踵至大呼五日不降者屠其城遇吉四面發大礮殺賊萬

人火藥且盡外國轉急或請甘言給之遇吉怒曰若輩何怯
耶今能勝一軍皆忠義卽不支縛我於賊於是設伏城內出
弱卒誘賊入城亟下閘殺數千人賊用礮攻城圮復完者再
傷其四驍將自成懼欲退其將曰我眾百倍於彼但用十攻
一番進靡不勝矣自成從之前隊死後復更進官軍力盡城
遂陷遇吉巷戰馬蹶徒步跳盪手格殺數十人身被矢如蝟
竟爲賊執大罵不屈賊懸之高竿叢射殺之復斃其肉城中
士民咸遇吉忠義咸巷戰殺賊不可勝計其舍中兒先從遇
吉出鬪死亡略盡妻劉氏素勇健率婦女數十人據山巔公
靡登屋而射每一矢斃一賊賊不敢逼縱火焚之闔家盡死
自成集眾計曰自此厯大同陽和宣府皆有重兵儻盡如甯
武吾部下甯有子遺哉不如還秦休息圖後舉而大同總兵

姜瓖降表至宣府表繼至遂決策長驅賊每語人曰他鎮復有一周總兵吾安得至此

應時盛遼陽人起家小校至都督僉事山西巡撫中軍副總兵慷慨仗義都御史巡撫蔡懋德深倚之崇禎間闖賊犯太原勢危急部下士數人倡亂時盛廉得誅之誓眾死守賊帥陳某與時盛有舊於城下誘降時盛以神鎗擊中賊衷甲帥嚙指而退城陷復下城巷戰突殺數十人賊騎充斥知不能免遂同懋德至三立書院曰請與公俱死先扶蔡就縊北向再拜引弓絃自絕

閻夢夔鹿邑人崇禎末爲代州參將城破抗節死

右明五十四人

梁化鳳字禮源陝西長安人順治三年以武進士官陽和高山衛守備精騎射饒謀略善撫軍士能得其死力姜逆之變以忠義激勵之令各屬兵以待大軍進勦遂率所部從臨陣張臂大呼矢石如雨不少避大小七十餘戰所向有功七年四月收復郡三州一縣五衛二城八堡十寨八臺三洞十五宵克宣力焉晉都督僉事後平海寇功尤偉擢提督授三等阿思哈尼哈番卒贈少保兼太子太保諡敏壯

愛松古滿洲鑲白旗人順治元年以佐領隨都統葉臣征山西時流賊李自成西遁其僞伯陳永福據太原大兵破攻之城圯永福挾眾突出愛松古以蒙古兵迎戰多斬馘獲馬千餘又追敗賊將馬驥於黃河獲舟十有五遂渡河進圍延安五年奉

命率蒙古兵六百駐防太原涇陽叛賊李陽以二千人來犯
敗之斬陽以徇又擊敗叛賊王亨明於交城是時叛鎮姜瓖
據大同賊黨劉遷糾眾萬餘謀犯代州與瓖犄角愛松古聞
報率駐防兵馳赴代州借遊擊高國棟籌畫守具遷擁眾驟
薄城下立雲梯乘城力禦之獲梯九斬賊三百賊益兵掘城
我軍自城上發矢石賊多死遷走繁峙六年正月復來潛犯
城郭奸徒內應門啟賊眾擁入郭愛松古督兵嬰城固守越
十餘日端重親王統兵赴援擊敗賊眾斬賊渠郭芳遷遁代
州平還駐太原瓖黨十餘萬由清源來犯巡撫祝世昌議以
賊勢猖獗宜相度形勢據險防禦使不得逼城下乃分遣將
士赴清源徐溝禦之會端重親王率兵自晉陽入協勦之賊
敗走

李進忠順治間任撫標右營中軍守備死姜逆之亂

詔恤其家祀忠烈祠

董廷儒督標營旗鼓守備死姜逆之亂

贈都司祀忠烈祠

謝應舉巡捕都司死姜逆之亂

贈遊擊祀忠烈祠

王廷衡陽曲人都司營中軍姜逆之亂賊據太原縣晉祠鎮
廷衡繕攻具賊棄之燬焉廷衡中乙酉武鄉試第一以死勤
事

詔恤其家祀忠烈祠

宋貴中冀甯舊營千總死姜逆之亂

詔恤其家祀忠烈祠

王命新舊營千總死姜逆之亂

詔恤其家祀忠烈祠

魯班禮鎮標營都司管遊擊事死姜逆之亂

贈遊擊祀忠烈祠

劉懋德沂鎮營遊擊死姜逆之亂

贈參將祀忠烈祠

管一舉得勝路參將死姜逆之亂

贈副將祀忠烈祠

李向堯遼東鐵嶺人助馬路參將姜逆之亂闔戶殉節

贈左都督僉事祀忠烈祠

彭有德遼東人以軍功升右衛參將姜逆之亂勢甚熾有德

抗志不屈賊圍署捍禦不支單騎潰圍投英親王帳家人六

十餘口胥遇害後仕至大同總兵

佟國仕遼東人井坪路參將姜逆之亂夜遣其黨周世德來襲國仕躍馬持兵驅眾巷戰既而城外舉火喊聲遙應遂爲亂兵所殺蓋世德舊爲國仕屬員前後左右胥賊黨也

贈副將祀忠烈祠

李吉甯武副將姜逆之亂部下徧從賊執吉說降吉力斥之投縊死

張國纓京衛人以武進士任偏關參將姜逆之亂業告疾得請矣聞變不以去位爲解出戰爲賊所殺

邱登戎甯武營把總死姜逆之亂

詔恤其家祀忠烈祠

許占魁蒲城人順治十一年任平陽副將盜張武等盤踞山

中時肆劫略爲民害占魁受事件不問令將士分布隘口一日乘大雪率精騎二百徑入山賊皆竄伏莫敢動因縛武而散其黨擢都督僉事後爲延殺總兵授世職卒

賄太子少保蓋恪敏
楊振榜陝西西甯人順治十三年任垣曲城守把總時土賊劫掠生擒渠魁四人同邑令立斬之餘黨驚遁次年張蠻子等嘯聚山谷單騎入賊巢諭以恩信賊就撫未幾復叛設計擒斬之自是賊患始息

李其昌字遜伯程鄉人康熙初任隰州專防都司十三年以病歸劉進忠叛脅與亂不屈賊掘地埋之並殲其家子方猷裁十五歲額官請復仇卒得賊首祭父墓

吳起爵廣東海揚人以克澎湖有功授太原總兵艱歸祀瓊

州名宦

費揚武正白旗滿洲人以內大臣撫遠大將軍兼攝右衛建威將軍康熙三十五年噶爾丹犯塞

上親統大軍出中路令費揚古率右衛大同及陝甘之師由西路邀擊時噶爾丹在克魯倫河登山望見

營大驚沿河西竄費揚古遇之於昭莫多乃遣兵挑戰故不勝以誘之而分軍爲三隊列陣以待賊至官軍皆步戰聞角聲乃上馬衝擊踰時賊大敗死傷蔽山谷我軍乘夜追逐三十餘里餘眾多降獲馬駝器械無算噶爾丹以數騎遁明年上幸甯夏復令統兵進剿中途知噶爾丹自殺厄魯特部眾相繼降擒其子女以歸凱還論功封一等公卒謚襄壯

札克當阿滿洲人平陽參將咸豐癸丑賊竄平陽時總鎮某

防守澤潞盡以兵行城中僅遺老弱數十人率以登陴賊攻南門躬然大礮斃賊百餘人再發礮忽炸斷其右手而東門已陷矣知事不可爲急歸署整衣冠坐堂上罵賊死全家並殉

贈恤如例祠忠烈祠

谷景昌鉅鹿人咸豐八年以武進士任平垣遊擊有膽略暢曉戎機屢著功績同治元年擒匪寇陝率士卒防堵極屐賊殺掠迅近陝州難民隔河呼救賊亦蜂擁將至景昌駕礮舟擊賊渡民全活無算豫民刻石頌德焉五年擒匪復西甯防禦嚴密賊不敢犯以功升澤州營參將六年出防吉州龍王延兵潰力戰死

贈總兵銜世襲騎都尉祀昭忠祠

劉國治山東人武進士選侍衛同治四年任東雍營都司六年十二月捻逆陷垣曲入四聖廟焚火自焚未死仍縊以殉
右二十五人

山西通志卷一百十四